



Tir Yimiyim

www.tiryimiyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimiyim@gmail.com

TAPAK 3 Yangia anidakangma : f Tir Yimiyim i tir_yimiyim

tir yimiyim TAPAK 8

Dharmendra Pradhan-i minister menden toktsütsüla: Rahul Gandhi

Malaysia Masters: Ashmita Chaliha quarter-finals-i iogo



VOL. XXIII ISSUE NO. 218 (ADOK 218) DIMAPUR ROGONÜ (FRIDAY) MONUPII (MAY) 22, 2026

₹ 5.00

Dimapur Municipal Council trust vote magitsü

Dimapur, Monupii/May 21 (TYO): Dimapur Municipal Council (DMC) nung chairman Hukheto Yepthomi anema no-confidence motion benokba jembitsü aser floor test agitsü atema senden ka ayongzüka aliba thiogo.

Brehostibarnü tezüluba nung osang ka aruba nung meyongnem agitsü 12 rongnung par trok-i DMC chairperson anema no-confidence motion agitsü bhukuma aliba agiener ta sangdong, ta Deputy Commissioner, Dimapur, Dr. Tinojongshi Chang-i metetdaksü.

Meyongnem agüja aliba jangjatepba sülen aser temulung süa ajitetba mechi Deputy Commissioner, Dimapur-i May

22 nü senden ka ayongzüka aliba thitsüogo aser no-confidence motion atema sangdong agüja aliba agiener aser shibanger, ta ashi.

DMC chairperson anema külem tenzüker temi no-confidence benoka mepetmesü adoka liasü, ajisüaka ken o angatettepa chairperson anema trust vote agitsü aliba agientsü lemtet, ta Naga People's Front (NPF) indang elected councillors temi Bodhbarnü shia liasü.

Party lenirtem tetsüingtai aitba sülen iba telemtetba ya agi, ta DMC nung elected NPF councillors tem tenüing nung chairperson Hukheto Yepthomi aser deputy chairperson Imlinaro Stephanie Ezung nati sandong ka nung shia liasü.

Tuli Paper mill nung inyakertem itasen atema luden ka shim

Dimapur, May 21 (TYO): Taoba mapang Nagaland tatar hoho nung lemtetba ama, Nagaland Pulp & Paper Company Limited (NPPCL) nung inyakertem nem ita sen magitsü aliba agitsütsü atema lenmang bushiteptsü asoshi Nagaland government-i Industries & Commerce department ajanga Luden ka shimogo aser iba luden yagi tang nungi küm ka tsüingda telemtetba agitsü tashi aser inyakim latettsüogo.

Iba luden nung Industries &

Commerce department nung Director menden asütsü aser NPPCL nungi nisung ka tezüluba asütsü. Tena denji District Administration nungi zngsem ka, Labour department nungi zngsem ka aser NPPCL Workers' nungi zungsem ka shimoka lir.

Iba luden yagi Tuli paper mill aliba mapang inyakertem nem ita sen magitsü aliba dak sentakba timtem ken o ajak angadanga, okadaki moi, telemterba tajung kati arutetsüsa inyaktsü tetuyuba agüja lir.

DC Kohima-i SUP nokdangba tanaben lepshir

Dimapur, Monupii/May 21 (TYO): Deputy Commissioner Kohima, B. Henok Buchem, NCS ajanga sangdong ka nung Kohima district kübok yimtsüing ajunga nung Single-Use Plastic (SUP) okshia nokdangba indang nenshia metetdaksü.

Home Department ajanga May 18, 2026 nü metetdaksüba aser Supreme Court-i February 14, 2026 nü totuyuba agitsüba aser Plastic Waste Management (Amendment) Rules 2021 nung aliba ama Urban Development Department, Government of Nagaland-i sangdong agüja aliba nenshir, ta ashi.

Iba sangdong nungya Kohima district kübok aliba yimtsüing ajunga nung single-use plastic oset balala nokdangba sülen shidak anidaksü totuyuba agüja lir.

Nokdanga aliba oset nungya tulu-tila mesüra temelem-tapu aser handles keter mesüra maket süang, plastic carry bags ajunga, plates, cups, forks, spoons aser straws ama plastic cutleries, Styrofoam (thermocool)

decorative materials, polythene, nylon, Poly Vinyl Carbohydrates (PVC), polypropylene aser polystyrene materials tem dena lir.

Urban Development Department ajanga December 2020 nung metetdaksüba ama departments, institutions aser government agencies temi sentong balala nung flex banners, boards aser posters amshiba nokdangba ta nenshia ashi.

Ano maneni plastic sticks aliba ear buds, balloons atema plastic sticks, plastic flags, candy sticks, ice-cream sticks, thermocol decoration oset, plastic trays, nanglong alepa aliba, invitation cards aser cigarette packets, 100 microns dang tajemba PVC banners aser plastic stirrers tema amshitsü memelar, ta metetdaksü.

Senden, seminar, sentong aser pei ajemtsü atema 20 litres tekübok packaged drinking water bottles tem maneni nokdangba, ta sangdong ajangasa ashi.

Nagaland nung Eliona AI supercomputer sayaogo

Kohima, Monupii/May 21 (TYO): Nagaland State Disaster Management Authority kübok Eliona nungja agitsü yangluba AI-native Climate and Disaster Intelligence Supercomputing Platform ajanga Nagaland nung alimar lendong timtem asoshi renema aliba nung tashi itshitsü, climate resilience aser scientific governance tsütsü tongtipang mera ka agiogo.

Iba ya Advisor, NSDMA and New & Renewable Energy, Z. Nyusietho Nyuthe-i Brehostibarnü Nagaland Centre for Disaster Management & Atmospheric Research (NaCDAR), Kohima nung sayatsü.

Home Department kübok NSDMA indang Joint Chief Executive Officer, Dr. Johnny Ruangmei-i iba supercomputer indang jembidang, Eliona ya 'next-generation AI-accelerated high-performance computing infrastructure' ka ama 'climate intelligence, disaster analytics, geospatial risk computation aser predictive disaster governance' nung rangloker yanglu, ta ashi.

Iba sapang yagi tzümsang mopung aser tzü-mopung modeling yaritsü, earth observation analytics, disaster simulations, AI aser machine learning research aser decision intelligence system nung yaritsü.

Iba yagi atmospheric science, geospatial intelligence, big data analytics, remote sensing aser

disaster governance frameworks lungjemdaksür.

Eliona yangluba nukjidong tulutiba ya alimar lendong ataloker telangzüba agitsüba masü AI amshia tzümsang-mopung takzüba, real-time data assimilation, predictive hazard intelligence ajanga takzüta renema alitsüba atema lir.

Iba sapang yagi tang ataloktsüba tzümsang takzütsü, tzümsang mopung takzüba nung tajungba, terrain-aware hazard modelling, disaster impact simulations aser dynamic risk computation jangjatetsü imlar.

Advisor Nyuthe-i iba sentong nung jembidang, Nagaland lisa, tzüinglu sashia aruba yimya, menoknok anokba, alinen, ajungben tzümetsüing, yipru aser tanga lendong aliba ajanga kanga junga asadanga tekeraba nung tekumdangtsü metetdakja mapang shidak nung telangzüba agitsütsü nungdaker, ta ashi.

Eliona indang high-performance computing capacity ajanga itemji takzütsü aser iba system yagi advanced weather modelling, tzüinglu arutsü takzüba, alinen aser tzümetsüing asadanga, geospatial hazaed mapping, climate risk assessment amala nung yaritsü, ta pai ashi.

Iba facility yagi Nagaland State Disaster Management Information System, disaster risk financing, parametric insurance, teraksa aser takosa asadanga,

urban resilience planning aser nüburttem renemshia alitsüba densema NSDMA inyakim tongtipangtem tashi itshitsü, ta ashi.

"Eliona ya State atema tongtipang telemtetba agiba nung yariba sapang ka akumtsü, department aser district administrations temi tajungba nung sentong yangluba nung yaritsü, tekeraba nung langzütsü aser lendong timtem ajemdaksütsü," ta Nyuthe-i ashi.

Ajisüaka technology kisüing ya tatem masü, district sasep nung telemtetba agiba, nüburttemi yaritepbaji Eliona asoshi chichiba tajangzüki lir, ta ashi.

Chief Secretary Sentianger Imchen, IAS-i iba ya state indang disaster management framework asoshi tongtipang terenlok lir ta ashi. Teyari agitsüba ya tongtipang lir, ajisüaka disaster management yagi predictive modelling aser scientific planning ajanga lendong timtem nungi jenbuttsüba nung tali rangloksüla, ta Imchen-i ashi.

Eliona takok angutsü ya district administrations, field-level systems, line departments, researchers aser nüburttem den ka kuma lungjemba nung keta lir, ta paisa ashi.

Home Commissioner Abhijit Sinha-i iba supercomputer ya Nagaland Centre for Disaster Management and Atmospheric Research indang shilem ka lir ta metetdaksü.

ADC Medziphema aser DC Mon ajanga ASF indang metetdaksür

Dimapur, Monupii/May 21 (TYO): Medziphema Sub-Division telungzüc nung African Swine Fever (ASF) cases kar aliba aser iba wara jatetsü akok ta olulu aliba mechi aser laboratory nung tendangba osang ano mejangjai liaka nüburttem ajungtsü mechi aser tashidak nungi jenbua alitsü mechi ak alepa aser ak shi ayokba azüoktsü nungdaka kumogo, ta Additional Deputy Commissioner, Medziphema, James Swu-i sangdong ka nung metetdaksü.

Anungji nisung kija, shi aleper, shishilempar, ak metsür mesüra shingai District Administration nungi jelia temelaba magie Medziphema Sub-Division telungzüc nung ayoktsü mesüra alemtsü atema ak aleptsü memelar, ta sangdong ajanga ashi. Nisung kari ayoktsü atema ak aleptsü tebilemba lira, office nem mezüing osang agitsütsüla aser temelaba meshitsüla.

Kevelelie Keyho, Livestock Inspector VFATI ajanga iba ak ji repringtsü, shiba iba mapa inyaktsü asoshi nungloksüba ketdangtsür lir, aser clearance agitsüba sülen ang ak aleptsü

melatsü, ta ashi.

Iba ama temelaba aser verification mali ak ayokba, belenba mesüra alemba ajunga iba totuyuba nung aibelener ama züingshitsü aser ozüing agi melaba ama inyaktsü.

Yimtsüing ketdangtsürtem, GBs, ward authorities, butchers, shi ayoker aser nüburttem dang iba totuyuba nung shidak anidaksü metetdaksür. Iba totuyuba ya May 20, 2026 nungi tarutsü nung sangdong ka magitsü tashi mapa kuma inyaka alitsü, ta metetdaksü.

Deputy Commissioner, Mon, Wennyeyi Konyak, NCS-ia Mon nung aliba nüburttem ajunga dang, Nagaland nung tesem kar aser anasa district tem nung African Swine Fever poktetba osang lir, ta ashi.

Iba tashidak ya kanga mela menatepa aor aser ak asoshi tebilemstü tulu, koba tekeraba nung nokdangtsü aser azüoktsü mera agitsü nungdaker.

Nüburttem aser shiruru kumzüka alitsü aser tashidak azüoktsü mechi Mon District nungi ak takum tanga district tem aser State alema bener aoba aser

tanga district aser state alema oa nungi bener aruba nokdangba, ta DC Mon ajanga metetdaksü.

Department of Animal Husbandry & Veterinary Services nungi jelia temelaba aser certification magie Mon District nungi aser Mon District telungi ak bener aoba aser aoba memelatsü.

ASF mazioktet tashi District ajunga nung ak shi ayokba nokdangtsü aser check gates, police personnel, veterinary ketdangtsür aser administrative officers temi iba totuyuba amshia kanga junga mittsü.

Ajungben asüba, temang metaba, tashi maitba, takep senttsü melenba mesüra yimya shidak masüba densema ASF symptoms aliba ak indang anasatiba Veterinary ketdangtsür nem itangjisa metetdaksütsüla.

District Administration den iba dak sendakba nung village councils, ward ketdangtsür, GBs aser nüburttemi amalitep akatsü metetdaksür aser iba totuyuba nung aibelener nem Disaster Management Act densema tapet ozüingtem kübok merenshitsü, ta DC Mon ajangasa May 21, 2026 nü metetdaksü.

Brick kiln unit tem atema awareness sentong ayongzüka agi



Dimapur nung awareness sentong ka agiba mapang DIC aser NPCB ketdangsürtem den brick kiln kibur aser mapa inyakertem tangokba noksa nung angur.

Dimapur, Monupii/May 21 (TYO): National Clean Air Programme (NCAP) kübok brick kiln unit tem atema special awareness aser sensitization sentong ka ayongzüka agiogo.

Iba sentong ya District Industries Centre (DIC), Dimapur aser Nagaland Pollution Control Board (NPCB) na longjemer Hotel Saramati, Dimapur Conference Hall nung May 21 nü agia liasü.

Mopung menenba, tzü mopung dak apet inyakyimtem benoka inyaksü aser National Clean Air Programme nükjidong nongita yaritsü atema kiln kibur aser mapa inyakertem nem tangazükba agütsütsü nükjidong nung iba sentong ayongzüka agiogo.

Sentong nung o jembiba mapang Yanathung Kithan, Scientist 'B', NPCB-i, mopung menenba ajanga nisungtem health, tzü-mopung aser tsüngsang mongpu dak kongshiba lemsatöp. Paisa, mopung merüka toktsütsü kodang tongtibang iba idang lemsatöpba den iba ya arok khuret lir ta ashi. Maneni pai mopung menenba azüoka yutetba ajanga taruba putu asoshi tzü mopung jenjang tajungba toktsütetsü, ta ashi.

Sentong nungsa Senior Environmental Engineer, NPCB, Aghali A. Swu-i, brick kiln industry tem nung environmental compliance indang lemsatöpba den iba sector ya kisüjensü aser mapa agütsütsü asoshi kodang tongtibang iba indang lemsatöp.

Laisa, brick kiln tem ajanga tzü-mopung menentsüba indang jembiba den tzü-mopung den apet inyakyim tem benoktsü aser technology tem amshitsü koda tongtibang iba indang lemsatöpba liasü.

Sentong ya N. Abeno Lotha, FM, DIC Dimapur lenisüba nung agi aser Chikuocho Nyusuo, GM, DIC Dimapur-i lokti pela agizükba o jembia liasü. Sentong nungsa Lucy Ngouri, FM, DIC Dimapur-i tepela o jembia.

Sentong tembangba sülen sensaksem sentong ka ayongzüka agi aser iba mapang sentong nung shilem agirtemi ken o balala asüngdangba aser temelenshi asoshi onük balala benokbatem angadanga shisalen sayurtemi bentetsütsü meranga liasü.

Mon nung Smart Electricity meters enoktsü tenzükogo

Dimapur, Monupii/May 21 (TYO): SDO Electrical Sub-Division Mon, Er. Thanyalo Kath-i sangdong ka ajanga, Mon jila nung lisopur aser electricity consumer tem ajak dang, power sector digitalization programme; RDSS (Revamped Distribution Sector Scheme) kübok India sorkar tetuyuba aser policy dak ajemdaker Smart Electricity meters enoktsüyonga odar, ta metetdaksüogo.

Smart meter enoktsüba nükjidongji ochi shia

inyaksangshitsü, bill shitak adoka meshitsü, energy management aser consumer tem nem electricity service tajungtiba agütsütsü asoshi lir. Meter ya temelaba agütsür aliba agency aser ketdangsürtem ajanga dang enoktsüyonga odar. Iba dak sendakba nung consumer ajak dang meter enoktsürtem den teka amteper inyaksü asoshi ketdangsürisa mepeshia metetdaksüogo.

Maneni nüburtem dang

smart meter aser installation inyakyim dak sendakba nung olulu osang mesüra osang teyazü prokshiba dak tamang makatsü mepeshia metetdaksüogo. Mejangjaba osang prokshiba ajanga nüburtem mangmangdaksütsü aser tetsübu adokdaksütsü.

Ken o jangjashitsü mesüra official osang asoshi consumer tem dang Department mesüra ANVIL ketdangsürtem den dang tongteprateptsü metetdaksüogo.

Medziphema nung merekmeju sentong ayongzüka agi



Dimapur, Monupii/May 21 (TYO): Tzüngluruwa tenzüktsü lia renemshia atatsü asoshi Medziphema sub-division nung May 21 nü merekmeju sentong ka ayongzüka agiogo.

Merekmeju sentong nung sorkar ketdangsürtem, riju balala, village council tem, GB tem aser

nüburtemi shilem agia liasü. Iba anogo kisüjensü dang amshiba osettsüt aser jananongnatem merektetsü, kilentsü nokdang aliba merektet, süngotu aser jana balala merektet aser nüburtemi teti amshiba facility balala merekteta liasü.

Medziphema Administration aser MTC-i jananongna merektetba nung teyari agüja liasü. Iba merekmeju sentong ya kanga takok ngua agiogo, kong sorkar office ajak, rijutem, business establishment tem, yimtzüng council aser nüburtemi shilem agia liasü.

EDTC-i auto anishirtem nem tetyuba agütsü

Dimapur, Monupii/May 21 (TYO): East Dimapur Town Council (EDTC)-i sangdong ka ajanga, EDTC kübok inyaksangshiba auto anshir ajak dang East Dimapur Town Council kübok auto rickshaws parking dak sendakba nung temzüng özüng sülen tashi anga anidaksü metetdaksüogo.

Auto anishir ajak dang parnok garitem ya EDTC-i temelaba agütsür aliba auto parking nung dang anentsü tetuyuba agütsüogo. Lenmang tezülen, shishilembadak, junction tem aser temelaba magütsü aliba tesemtem nung gari anena ayuba ajanga gari senzüsensong nung

tetsükdaksü adoker aser nüburtem nem timtem agütsür. Maneni Parking Councillor In-charge-i EDTC kübok parking management dak sendakba ken o ajak achaayangtsü. Parking temzüng özüng sülen tashi anga manidakertem dang senchi achitsü, temerenshi balala agütsütsü aser jenjang tapet agütsü.

Ken o dak sendaka alir ajak dang nüburtem nem timtem magütsütsü aser tetsükdaksü kecha makai garitem senzüsensongtsü atema tetuyuba sülen tashi anga anidaksü mepeshia metetdaksüogo.

Kohima aser Mon DPDB senden May 26 nü amentsü

Dimapur, Monupii/May 21 (TYO): May ita atema Kohima District Planning and Development Board (DPDB) senden May 26 nü 11 ako nungi tenzükba DPDB Conference Hall, Kohima nung amentsü.

Board züngsem ajak dang iba anogo aser mapang ya temulungdang yur senden nung tamakok maludaksüi shilem agütsü mepeshia metetdaksüogo.

Kasa mapang nung Deputy Commissioner & Vice

Chairman, DPDB Mon, Wennyei Konyak, NCS-i, Mon District District Planning & Development Board züngsem ajak dang ita shia amenba DPDB senden May 26 nü 11:30 ako nungi tenzükba Deputy Commissioner, Mon conference hall nung amentsü ta metetdaksüogo.

Anungji züngsem ajak dang iba anogo sentong kecha meyanglui atar senden nung shilem agütsü mepeshia metetdaksüogo.

REGIONAL INSTITUTE OF EDUCATION, BHUBANESWAR
(National Council of Educational Research & Training)
Sachivalaya Marg, Bhubaneswar-751022

Admission Notification for ITEP - 2026-27

Advt. No. 547 Date: 20.05.2026

Regional Institute of Education (RIE), Bhubaneswar, constituent unit of NCERT, is a premier teacher education institution catering to the school education and teacher preparation of Eastern Region of India. The Institute is known for its quality teacher education programmes, academic excellence, research activities, extension and integrated teacher education programmes designed in accordance with the National Education Policy (NEP) 2020.

This is to inform all candidates who have appeared in the National Common Entrance Test (NCET) 2026 conducted by the National Testing Agency (NTA) for admission into the following programmes for the academic session 2026-27, that they are required to regularly visit the official website of Regional Institute of Education, Bhubaneswar for registration and submission of online application forms for ITEP counselling after the declaration of NCET results.

- ITEP B.Sc.B.Ed. (Middle)
- ITEP B.Sc.B.Ed. (Secondary)
- ITEP B.A.B.Ed. (Middle)
- ITEP B.A.B.Ed. (Secondary)

The online application portal for admission into RIE Bhubaneswar will be made live shortly.

Candidates are advised to keep visiting the Institute website www.riebbs.ac.in regularly for further updates, admission guidelines, important dates and counselling-related information.

I/C PRINCIPAL



May 21, 2026 nü Chennai nung cabinet minister tem tenangzükba agiba sentong nung Tamil Nadu Angh, Rajendra Vishwanath Arlekar, Chief Minister C Joseph Vijay aser tangartem tangokba noksa nung angur.

Ebola wara ajanga India-i India-Africa senden atsülanger

New Delhi, Monupii/May 21 (Agencies): Brihostibarnü Delhi nung aliba Indira Gandhi International (IGI) Airport nung kerdangsertem passenger tem dang Africa tesem kar nung Ebola wara prokba tamajungba akümba atema tekümdangtsü metetdaksü.

Iba wara ajanga Uganda aser Democratic Republic of Congo (DRC) na nungbo nisung 100 jungnüa süadokogo aser IGI airport nung health screening tenzükogo.

Directorate General of Health Services (DGHS) tetuyuba nung ajemdaker Delhi Airport-i X ajanga Ebola wara aliba linüktem nungi arurtem mesüra item linük jagi aoertem nem tekümdangtsü osang

metetdaksü. DGHS-i tayimtsü nung senzürtem aser airport ketdangsertem dang kanga kümümba alitsü aser iba wara keta aliba temaitsem meteta alitsü metetdaksü.

Ebola keta alirtem dak temaitsemtemji temang metaba, saaktsüba, anibelemba, tebok aoba, tekolak menüba, azü ayimba, shi tetsü ashiba aser terok mesakba densema lir.

DGHS-i, India tonga aruba sülen anogo 21 tsüingda passenger tem dak item temaitsem lira tekeraba nung medical teyari bushiang aser healthcare ketdangsertem nem item osang tejangja metetdakjang, ta tuyuogo.

Delhi Airport-ia passenger

tem dang health screening agiba mapang nung amalitepdaksüner, ta mepishiogo.

World Health Organization (WHO)-i Congo tesem kar aser Uganda nung Ebola poktetba ya Public Health Emergency of International Concern (PHEIC) ka lir, ta sangdongogo.

Bodhbarnü Jordan linükibo Democratic Republic of Congo aser Uganda na nungi aruba passenger tem nokdangogo.

Ano külen tanga osang ka nung, Africa tesem kar nung Ebola prokba nung ajemdaker Centre sorkari India-Africa summit atsülangogo. Iba senden ya taruba hopta New Delhi nung agitsü sentong liasü saka iba wara prokba nung ajemdaker iba senden atsülangogo.

West Bengal nung ozüing alema arua alir bendangertem meindoktsü

New Delhi, May 21 (Agencies): Tawa West Bengal assembly election nung BJP-i takok ngua sorkar akümba sülen state sorkari ozüing alema arua aliba Bangladesh nungertem meindoktsü atema maparen tenzükogo.

West Bengal Chief Minister Suwendu Adhikari-i 'Detect, delete & deport' inyakyim sangdongba den külemi DGP aser Chief Secretary, Manoj Agarwal na dang iba inyakyimji mapa kümba inyakang, ta tuyuogo.

Chief Minister Adhikari-isa India-Bangladesh arrtsülen aliba police stations ajak dang ibaji mapa kümba inyakang, ta tuyu.

Chief Minister-i taruba küm ka tsüingda Bangladesh den international arrtsü nung atsü atsüba maparen tembangtsü atemzükogo.

Yaküm May 14 nü Union Home Ministry tetuyuba nung ajemdaker Chief Minister Adhikari-i, police dang ozüing alema arua aliba Bangladesh nungertem maitsü jangjaba sülen aputsü aser meindoktsü tuyu, ta metetdaksü.

Citizenship Amendment Act (CAA) kübok senso temeden angutsü temsüa malirtemji Border Security Force (BSF) ket nung agütsüba sülen meindoktsü.

State sorkar telemtebaji pusema Union Minister aser

BJP lenir Sukanta Majumdar-i, "India ya 'Dharamshala' ka masü," ta metetdaksü.

Majumdar-i, "Refugee temi CAA ajanga senso angutsü saka refugees masürtembo parnok limai meyipa yoktsü," ta metetdaksü.

Bengal-Bangladesh arrtsü nung solar-powered aser ai aketba atsü atsütsü atema state sorkari BSF sepaitem nem ali acre 75 agütsüogo.

West Bengal aser Bangladesh na tsüingda arrtsü kilometer 2,217 lir. Tang tashi nung kilometer 1,600 nungbo atsü atsüadokogo saka taoba sorkar kübok ali tsütsü mangatettep aliba agi kilometre 600 jungnüa nungbo atsü matsü.

Dharmendra Pradhan-i minister menden toktsütsüla: Rahul Gandhi

New Delhi, May 21 (Agencies): Brihostibarnü Lok Sabha nung opposition lenir, Rahul Gandhi-i NEET question paper leak asüba atema Centre-i kecha meinyakteter, ta aitsü.

Congress lenir Gandhi-isa Union education minister Dharmendra Pradhan menden nungi anentsütsüla, aser tarutsü nungbo paper leak masütsü atema inyakyim tashitaitba kümba yanglutsüla, ta takhangba agütsü.

Rahul-i, linük tesem ajaklen paper leak asür, anungji Congress-i maneni kaketshirtem atema raratsütsü, ta metetdaksü.

"Dharmendra Pradhan menden nungi manen tashi aser linük nung paper leak asüba anentsü atema inyakyim tashitait ka mebenok tashi onoki iba rara manentsü. Iba rara ya sorkar tamakok ajanga takoksa anguba kaketshirtem atema raratsüba tongbang ka lir," ta Rahul Gandhi-i X ajanga metetdaksü.

Mapang shia paper leak

asüba ajanga linük tesem balala nung kaketshirtemi longkak aittsüsa akümer, iba denji külemi iba tamakok atema sorkari khuret magir, ta pai ashi.

Ato kilonser Narendra Modi aija Rahul-i, "Italy nung Modi-i nanglong agütsüba noksa tangokba mapang India nung lanurtembo paper leak asüba ajanga timtema lenmang nung ochi temeden takhangba agüja longkak aiter," ta metetdaksü.

Congress MP-isa, NEET paper leak asüba ajanga kaketshir lakh aika tarutsü tia raksatsüogo aser kaketshirtem aika soseta süogo, ta metetdaksü.

Paisa Centre sorkari Pradhan minister menden nungi manentsüba aser BJP-i yimsüsüba state tem nung iba ken o nung longkak aitertem dak tashiyim amshiba atema aitsü.

NEET UG exam ochimashi anema Brihostibarnü Congress nung inyakertertem BJP state headquarters tashi longkak aita oa liasü.

S. Korea nung Indian War Memorial semzük



May 21, 2026 nü South Korea yimtiba, Seoul nung India Defence Minister Rajnath Singh aser South Korea Minister of Patriots & Veterans Affairs, Kwon Oh-eul nati Imjingak Park nung Indian War Memorial semzüksüadang tangokba noksa nung angur.

New Delhi, May 21 (Agencies): Brihostibarnü India aser South Korea nati taoba mapang sepaitem tsüingda amaliteptsü atema tezüingzüktep ka agi aser Indian War Memorial ka semzükogo.

South Korea yimtiba, Seoul nung aliba Imjingak Park nung India Defence Minister Rajnath Singh aser South Korea Minister of Patriots & Veterans Affairs (MPVA), Kwon Oh-eul nati Indian War Memorial ji semzüksüogo.

India-i Korean War (1950-53) nung shilem agiba sülen küm 75 ajungba nungtem nung India Ministry of Defence-i 25-square-metre memorial ji yangluja liasü.

Iba tesem nungjisa 1954 küm September ita nung Custodian Force of India (CFI)-i "Hind Nagar" amenoka liasü.

Korean War mapang nung India-i raratsü atema sepaitem meyok, ajisüaka India-i 60th Parachute Field Ambulance

yoka liasü. Iba war mapang nung nisung 627 densema aliba medical unit jagi medical teyari agüja liasü. "Maroon Angels" ta ajaba unit jagi tongbang raraba tesem nung yiruba sepaitem aser civilian meyirjang aika yaria liasü.

May 21, 2026 nü semzükba Indian War Memorial nungji Korean War mapang India nungter sepaitem tongti ana indang kürakyanglu lir. Lieutenant Colonel A.G. Rangaraj ya 60th Parachute Field Ambulance nung Commanding officer liasü aser General K.S. Thimayya ya Neutral Nations Repatriation Commission (NNRC) nung chair liasü.

Kasa sentong nung Korean Minister Kwon Oh-eul-i asür Lt. Col. Rangaraj ya 2026 küm March ita atema "Korean War Hero of the Month" ta shia nungo ka agütsü. Iba nungoji par semchir Kalpana Prasad-i agizüka liasü.



May 21, 2026 nü Ranchi nung Maoists telungpurtemi 'surrender' asüba sentong ka nung Jharkhand DGP, Tadasha Mishra den Jharkhand Police, Jharkhand Jaguar aser CRPF nungi tongti ketdangsertem tangokba noksa nung angur.



TIR YIMYIM YIMOBILEM (EDITRIAL)

DIMAPUR FRIDAY, MAY (MONUPII) 22, 2026

Longlenga metongteter na ?

Linük nung BJP government arur külen inyakba mapa tajungtem rongnung kaji, ita shia state shia dangi Union minister ka mesüra kabosa yoka nübertem tsüngdong oagi ajurutepa parnok nüngdak angadanga dang masü saka parnok tenük agi reprangtetba mapatem inyaktsütsü asoshi tebilembatem lemsatepa sentong yangluba ya asütsü. Iba jagi, shin o nung, tenük agi angung dang amanger, Seeing is Believing, ta ashiba ama, Delhi nungi mener jembiba aser sentong atongbaji masü saka nüngdakba tesem aser nübertem tonga oagi terenlok mapatem inyaktsüba sentongtem indang jembibajiang shitakba mapa küma inyaktsüba temulungjang, tetsüng, teka aser tebang, temeli asütsü. Ajisüaka, aiben Nagaland mangu aser Naga nunger otsü memetet aser majurudang ser Delhi nungi dang Nagaland asoshi sentong yangluba agi senbo endok saka mapa teinyaktetba kecha maka ser nübertem akoksar anener. Kasaji, asenoka nübertem taliba jenjang aser senzusenpongba tia mangu aser memetet ser Kohima nung mena yur sentong yanglutsür, iba jagi aiben nüngdakba nung sen endoker saka nüngdakbatem nungbo sen magütsüteti nübertem timtemdaksür. Aji oda, tang Delhi nungi Union minister, Jitan Ram Manjhi Chümoukedima tashi arur Longleng purtem jaoka Chümoukdima nung police aliba tesem nung Longleng district asoshi terenlok jembibaji junger saka temulung masür. Jitan Ram Manjhi-i tangar district-tem masü saka mejetmejeta Longleng purtem Chümoukedima nung pa ajurua senden alitsü asoshi jaokba tetezüji, pa Nagaland-i arubaji Longleng district atema aruba liasü ta angateter. Aji shitak süra, pa Longleng district tonga orr, Longleng town dang masü saka tezü nung aliba yimtsüng karbo semdanga oagi reprangdang nungbo koda jungla ta bilemer. Atangji, pai Delhi nungi aruagi Chumoukedima nung mena yur Longleng district atema terenlok mapatem inyaktsü indang jembibaji oagi Longleng nung aliba nübertem jenjang den mapettsüa akok. Aji oda, pai Longleng district lenmang nung gari agia aser tetsüng agia mejajadang, Longleng district nung aliba yimtsüngtem nung tzü tajemtsü pipe agi tonga ali asü maliar memetet, Longleng district nung government school aser mozü ki jenjang mereprangdang, anungji itemji koba ama tia ka nung aliar memetet aser Longleng district nung aluyimba indanga mangu, anungji Longleng district asoshi kechisa tenüngdaktiba asütsüar, pai meshitetsü. Atangji, Longleng district nungi yimsüsüri anir tongti ketdangsertembo ajak oagi Union ministeri ayongba senden nungji dener alitsü, anungji parnoki ashiba nüngdaktemji dang angadanger minister-bajibo orr asütsü. Ajisüaka, minister ta asüba English ojang tetezü ya meteta minister kati inyak nungbo, tesem matong ser tezü ka nung mena yur ketdangpurtem jaoka osang agitepba kisung jagibo meperitsü aser nükjidong mataloktsü. Aji oda, Longleng district atema terenlok mapa inyaktsütsü asoshi Longleng purtem ajurui aruba Longleng tonga mao ser len tom nung anener, Longleng purtemang jaoka jembibaji, Longleng purtem asoshi dang masü saka minister-ba atemajia jangmatem mapa tuluka asütsü. Ashiko, Delhi nungi arusang jagibo pa Delhi nungi Chümoukedima tashi arubaji pa-ang lenji talangba aru amai bilema alitsüa akok, saka Longleng atema aruba Longleng mengudang ser Longleng indang tanga tesem nung jembir aobaji, shiranger anepalui aruba doctor-i shiranger mangu aser majuru ser tzü-ang peria jembidakjang ta shir ao amai asütsü. Aji oda, Delhi nungi Longleng-a metongtet ser len tom nung lenirtem den jembir aoba jagi Longleng district nung aliba nübertem jenjang aser tia meteter amai bilema jembira, iba jagi Longleng district nung alirtem dang masü saka Nagaland ajunga akoksadaksütsü, kechiyong tesem tajung ka nung lenirtem ajuruba jagi yimtak yimtsüng nung aliba nübertem tiabo memetettsü. Tanü yangi lemsatepba onük yagi Kohima aser Delhi nung alirtem kar narong danga atong nungbo, ya serbo Kohima aser Delhi nungi yimtsüngtem tonga oagi reprangdangtsü bilemdaksüner, kechiyong tenük agi angubajing tamangtsüka asütsü.

OLEMSABANG

AJEMALUBAASER OCHISHIBANUNG TEMOATSÜ

~ IMTIKUMLA IMCHEN

(Iba Yimdangjem otsü ya Tir Yimyim aser Bookipedia nati ayongba toktep nung shilem agirtem rongnung ka liasü)

(Yashi adok nungi...)

Par kinungertem mozü tajungtiba agi yariyonga tashiji shia maruteti temang tamajungba dang aküm, kechiyong küm aika machi majem den shisabulua aliba agi temulungjang tashidak adokadoker liasü. Ita ishika lir iba tashidak agi asü. kodang pa asü kinungertemi tebuttsü aser tanurtem tebumangtak nung atentsü osang yok, saka shinga maru. Ano tatsüka lir tedi tanubusang tebuttsüa süadok yamaji tasüba agi atong atonga dang menüpa liasü. Tasüla Kinungbu tena chirnur asem liasü ajakji küm nungbo tain saka mapa mashi liasü kidang parnok pungu jangratema dang lia arur tetsü maliji tebu den sangrema alitsü mapang aru. Tebuttsü sür mapang talangka tashi tebuji animasüngdangteti ali nung pur medemertemi pa mulung shirangba ngua yi tera jemdaktsüdi iba jagi terabo süngzüksü ta shia jemdaktsü, anogo shia terara jemdaktsü nung ibaji pa asoshi yi ajemtsü tetenzüker aküm. Oda liyonga aodangbo tanurtemia ajem, joko tebuji anir tanur ajak yi jemer dang asüba agi yimtak nungi aridoktsü ta yimsüsü nungi osang aru. Joko koda masüi majemtsü ta yimsüsü dang nangzük, iba mapangji tatsüka dang lir ano jemeso. Tebuji tambur asüsung yi agi leter süadok tanur asem lajar akum.

Item tataloktsü ajakji Tsüngremi tanubusang shibai Tsüngrem metet pa dang shiadoker liasü. Alimai nükshia aliba kibong to ka ken ka ken ta lurepa aküm. Iba mapang tanubusangjibo tali tajungba nung dang Tsüngremi anishi.

Kenü par yim anasa aliba yim ka nung asentenshi sentong akatsü renema liasü aser missionary ka jaoka Tsüngrem osang abentsü arogopurtemi bangjemtep aser par asem-pezü ka missionary ba dangi asüngdangi ao. Kodang missionary-bar yimji anasabai tonga ao, idakji yim atongtsü anasa süngküm yanglur liasü aser idakji tsüdenmongertem parnok nisung ana mena liasü. Missionary-ba dang par yimertem jagi 'Nangpong' tasa aja kechiaser pa ajak nung kanga dang tetangshi nisung ka liasü, anungji yimertem jagi naroküm agütsüba tamaitsü yamajisa jaa liasü. Saka missionary-ba nübu tasüngdangi arurtem jagibo 'Nangpong' ta masü 'Napong' ta angashia liasü. Kodang parnok yim süngkümüji tonga ao, tsüdenmongertem jagi "Nenok kechi atema arur?" ta asüngdang nung parnoki "Napongba dangi arur, pa azünga lira ozü yimer asentenshi sentong ka akatsüba lir, aser onoki pa nübu idakji nüngdaker" ta langzü. Par yimertemji shiruru metsüba nung kanga tajung liasü aser yamaji nashi, napongtem ajakji kanga dang junga mesütem.

Anungji tsüdenmonger anaji ka süngküm nungji mena ata aser kati aienertemji anir par yimtak napong timtiba alibar ki jagi anir oa sayunung, aienertemji kati ka dak rangshia reprangtep. Tsüdenmongertem jagi teti par yim jagi tanga yim nungi aienertem aibensa benjungbentsü atema nashi-napong asüngdangisa aruba agi parnoka iba atemaji aruba asütsüa ta bilema par ki jagi anir aoba liasü. Parnok ajak ken rarartetpa lir tanurtemi nüryemer nangpongbarji missionary ta anoki angashi nung pa tsüngrem o jembitatksutsu asüngdangi aroba ta ashi, parnok ajak kanga menütep aser nangpongbar kidangi anir ao pa den ajurutepdaksutsu. Iba oji tembanga jembir senshi aser mapang tatong nung ao tsüngrem osang aben. Tsüngrem meimba temeshi nisung asü nung jentipur temoatsü ngua tebela tulu nung iba asentenshi tembang. Saka tedi ama majungba agi pa kanga nemametangteti liasü.

Asentenshi tembanger arudang arogo purtemi pa meinokja len tom tashi arudang temenen tenelai apuba nisung ka ajuru. Pai parnok dangpo kecha tamajung mashi saka lemanng teyong nung mejanger ata. Parnoki tsüngrem dang iba temenen tanela pa nungi aridokjang ta sarasadem, pa dang sakang ta ashi nung junga kümer menürema sak. Ibaji asentenshi akaba yimer ka liasü. Parnok ajak pelatepa salemer senshi. Iba mapangji alu arotsü mapang anasa liasü. Iba asentenshi nung parnok ajak melenshia kibuba pei taküm nung kibur aser kümtedakba ta nangzüka tepela tulu nung aliba mapang asünung Tsüngrem dang temoatsü meshia alu arotsü tenzük. Yimer ajak tsük jenti aro iba jagiochi shia tenla shitak bena taobamapang dang nungi timbabenden.

(Maneni asüng adok nungi...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

South Korea nung Uijeongbu Billy Graham Crusade agiogo



May 17, 2026 nü Uijeongbu Sports Complex, South Korea nung ayongzükba Uijeongbu Billy Graham Crusade nung Will Graham-i sayutsüngidang tangokba noksa nung angur. Will Graham ya Billy Graham Evangelistic Association nung executive vice president lir.

May 21, 2026: May 17, 2026 nü South Korea yimtiba, Seoul nung sayutsüngir Will Graham leniba nung agiba evangelistic crusade ka nung nisung 21,000 dak tema aden, aser noklang aikati Yisu Khrista agizüka liasü.

Uijeongbu Billy Graham Crusade ya Seoul nung aliba Uijeongbu Sports Complex nung agi. May 17 anogo nung 30 degrees Celsius tashi tua kanga tatsük liasü saka iba crusade nung adentsü atema nisung meyrjang aika adenshi aser iba sentong nung nisung 695-i Yisu Khrista sülen anidaksü atema telemtetba agi, ta Billy Graham Evangelistic Association (BGEA)-i metetdaksü.

Nüngtugu sayutsüngir asür Billy Graham'er semchir, Will Graham-i iba sentong nung Tsüngrem O jembia liasü. Will Graham ya BGEA nung executive vice president lir.

Will Graham-i Luk tapu 15 nung aliba tamadokba jabaso otsü nung ajemdaker Tsüngrem O jembia liasü.

"Lanursangji kidangi meyipa ao. Tebui pa ata-a talang nungi repranga dang liasü. Yamaji Tsüngremia na atema bilemtesür. Taonung nai kodaker Tebu kidangi arutsü asü?" ta Will Graham-i lokti ayongzük.

Crusade ayongzükertemi ashiba agi, iba sentong ya Korea nung Khristan lanurtem rongnung asentenshi milak jangrudaksütsü tayongzükba agüja agi.

Will Graham-isa, "Aiben asenoki GPS sendoker lenmang tai nung jajar. Asenoki tim lenmangji tai ama bilemer aser asenoki shimba lenmang tai nung ang jajar. Taküm nung lenmang shidakba nung jajatsü atema Khrista dangi meyiptsüla," ta ayongzük.

Pai Tsüngrem O jembiba sülen nisung noklang aika sabangleni oa Khrista nem taküm bendanga agütsü.

Iba sentong nung Australia tsür kentener aser Hillsong United nungi Taya leniba nung tekülem aser tetushi agia liasü. "Asenoki Yisu tenüng dang

ajungkettsütsüla aser Pa tenüng dang sangdongtsüla," ta lai ashi. BGEA crusade ayongzükba nung Arogo 260 dak temai yaritepa liasü. Iba sentong nung yimti 10 nungi Arogo 5,000-i shilem agia liasü.

1952 küm Korean War mapang nung Billy Graham-i Korea semdanga liasü aser 1973 küm Seoul Crusade nung pai sayutsüngia liasü. Anogo pongunü crusade nungji nisung million 3.2 dak tali aden aser nisung 70,000 dak temai Yisu sülen anidaksü telemtetba agia liasü.

Ajioda Billy Graham-i Korea nung sayutsüngiba sülen küm 73 lir tang par semchir Will Graham-i Korea semdanga sayutsüngiogo.

Uijeongbu Kwang Myung Church nung pastor aser Will Graham atema oshi meyipzüksüsang, Shin-hoo Choi-i, "Iba crusade ya tetenzüker ka asütsü ta ni amanger. Iba ama sentong ya Korea nung tanga yimtitem nunga agitettsü atema ni sarasademer. Ozü yimti mezüng shimba atema ni Tsüngrem dang pelar," ta metetdaksü.

South Korea semdangtsü jakdang May 4-5 anogotem nung Japan kübok Matsuyama City nung Will Graham-i anogo ananü sentong ka nung sayutsüngia liasü. Iba sentong nungji nisung 3,000 dak tali aden aser nisung 180-i Khrista nem bendanga agütsü.

ANOGO ABEN TSÜNGREM DEN

Temenenpur medemer

Anema alir asoshi mozü shitetter tenungdaksü maka, saka shiranger asoshi tenungdaksü.

(Matt. 9: 12-13)

Nikongtsütsü ka Yisu alimelen sarur aser temenen pur den külemi chiyungtsü asoshi mena liasü. Kodang Farisitemi aji angu nutsüngtem dang iba yimya anema tai aputsü asüngdang. Yimsü nung lenirtema Pa yimya ngur kanga dang jashi. Saka Yisu-i langzü "Anema alir asoshi mozü shitetter tenungdaksü maka, saka shiranger asoshi tenungdaksü..." Yisu-i temenenpur taküm yimya nung shilem magi, saka Pa shimangbo temenenpur rongnungi pa sasa kodanga pila-a mali asü. Pai temenenpur pa den medemer akümtsü asoshi parnok den mapang indok.

Anogoshia taküm mapa nung tai temenen jenti beshir adianu parnok den alir. Khristan kati item adianu meima medemer akümtsü nungdaker. Rom nunger tezülur Tertullian-i Khristan aser Khristan masür tesendaktep asoshi yamai zülua lir" Onok nenok rongnung alir, kasa chiyungtsü achir, suoshi kasa sobur, nenok den külemi iba lima nung jajar, nenok den shishilemba ka ser aor. Khristan kati item mapa aser adianu rongnungi pila-a alitsü makok. Yisui inyakba ama inyaktsü asoshi kecha mapa tasak masü. Tanü sama-a aliba bushidi. Taküm nung mapang shia ya asüngdangtsü junger. "Ni khrista atema medemer kwi lir?".

Nicaragua nung Protestant pastor ka chioktsü atema takhangba agütsür



Pastor Efrén Antonio Vélchez López

May 21, 2026: Khristan temeden atema inyakba organisation kati Nicaragua nung pastor Efrén Antonio Vélchez López tepuokdak nungi chiokang, ta takhangba agütsür.

Pastor Lopez apuba sülen küm pezü ajungba mapang nung pa chioktsü atema takhangba agüja international petition campaign ka tenzüka Europe aser America nung aliba diplomatic missions nem-a iba petitionji agütsüogo.

Christian Solidarity Worldwide (CSW)-i renemba petition nungji nisung 10,000 dak temai sign süa lir. Parnoki Nicaragua sorkar dang telatetba kecha meyui tangsa Protestant pastor Lopez chiokang, ta akhanger.

Iba petition ji linük 8- US,

Mexico, Switzerland, Cuba, Belgium, Colombia, Austria aser El Salvador nung aliba Nicaraguan embassies aser consulates nem agütsüogo.

2022 küm May 15 nü police-i Pastor Vélchez López dak azükba sülen pa pua liasü. Iba sülen anogo asemnü lir ketdangsertemi, pastor-i tanur ka tashiyim amshia raksatsüogo, ta pa nem tai tonglokja liasü.

Ajisüaka CSW-ibo, pastor-i Nicaragua Tir Daniel Ortega-i aniba sorkar aitsüba agi ketdangsertemi tiyazü nung pa nem tai tongloktsü, ta metetdaksü.

2022 küm September ita nung Managua nung aliba Third Specialised District Court for Violence-i pastor Lopez küm 23 tepuokdak ayutsü atema

obendang agüja liasü.

Ajisüaka CSW-i ashiba agi, court nung pastor anema ken o angadanga mapang nung pastor-i aibelena maliba kulitem reprangdangtsü atema court-i memelungi liasü.

Iba dak alia tanur ka tashiyim amshia raratsüba tatalokba mapang nungji pastor Lopez ji iba tesem nungji masü saka tanga tasen ka nung ang liasü.

Tang pastor Lopez ya Jorge Navarro National Penitentiary System nung puoka lir. Pa diabetes aser high blood pressure na densema temang nung timtem aika lir.

CSW-i ashiba agi, jail nung pa ket nungi Laishiba aser tenük-aina meshizüka yuogo aser kaket azüngtsü atema pa nem temelaba magütsür.

Pa nem medical teyari magütsür aser 2024 küm August ta nungi tenzüka pa nem anogo shia tzü agütsüba ajema kümstüogo aser kimai ayazüka alutsü memelar.

Iba denji külemi pa nem chiyungtsü, mozü aser nüngdak balala agütsütsü atema kinüngertem nem temelaba magütsür.

CSW Director of Advocacy nung tekolak, Anna Lee Stangli, Pastor Vélchez López nem tai tongloktsübaji tiyazü nung tai

tongloktsüba lir, ta ashi. Laisa, küm pezü tashi tepuokdak aliba mapang pa health kanga mejungi kümogo, ta ashi.

"Onoki Nicaragua sorkar dang telatetba kecha meyui tangsa pa chiokang ta akhanger. Iba denji külemi yimsü lenirtem kangshia meindokba aser apuba anenang ta akhanger," ta laisa metetdaksü.

CSW-i ashiba agi, Nicaragua nung yimsü temeden alema inyakba jenjang kanga mejungi kümogo; 2024 küm yimsü temeden anema inyakba tatalokba 222 liasü saka 2025 küm nungbo tatalokba 309 liasü.

Tangbo iba linük nung police-i pastor tem aser putirtem inyaksangshi ajak tenük yoka repranger aser yimsü dak sendakba sentongtem agütsü atema ketdangsertem dang nungi jelia temelaba meshitsüa akümer.

CSW-isa, 2018 küm nüburtemi sorkar anema longkak aitba mapang nungi tenzüka sorkari Arogotem anema inyak tenzük, ta metetdaksü.

Tang alima nung Khristantem alitsü atema linük tamajungtiba 50 rongnung Nicaragua ya jenjang 32buba nung lir (Open Doors World Watch List).

AO OSHI ANGAZÜKDAK:

TANÜ ANGAZÜKTSÜBA OJANG



Yazü

(n) o meshitaki jembiba, tai ashiba (lies)

* Tanuri yazü kanga jembir.

Yazümajung

(adv) tejok machet, tangar memenep, kecha mesetetba (useless and weak person)

* Tanü asüng lanurtem aika yazümajung küma aoer.

OLONG PAITEP # 7511

15x15 crossword grid with numbers 1-18 indicating starting positions for words.

TIPLIN

- 1. Inyaker ajangtelba - (3)
3. Bangsemo adokdak - (5)
6. Shitak mesüi inyak - (7)
7. Ya mimong nung angur - (3)
9. Reprangzük - (4)
10. Tasola - (5)
11. S _ _ _ _ - (4)
13. Yagi ajak ashioktsür - (3)
15. Ki aokba oset - (7)
17. Ak shi nung inokba tasen - (5)
18. Ishika - (3)

LANGTSÜNGLEN

- 1. Meshidak - (3)
2. Tanaben soshir - (7)
3. Iba anogo - (4)
4. Meshi - (3)
5. Yagi mi tsüklaker - (9)
6. Shi tapu ka - (9)
8. Yagi ayimer saka ozü masü - (3)
9. Ajokba shiruru ka - (7)
12. Inyaktet - (4)
14. _ _ _ hi - (3)
16. Akümüli nungi pilar - (3)

OLONG PAITEP # 7510 TELANGZÜBA

TIPLIN :

- 1. Telok, 4. Aluru, 6. Ozüng, 8. Emk, 9. Kin, 10. Teti, 12. Süir, 13. Jen, 14. Ola, 16. Talak, 17. Mazük.

LANGTSÜNGLEN :

- 1. Tenükjang, 2. Luden, 3. Kiooktsü, 5. Lenti, 7. Tajangzük, 11. teronem, 12. Sempa, 13. Jahaz.

Manipur nung security force temi IED, prangbong injang ngutetogo

Impthal, Monupii/May 21 (Agencies): Manipur kübok Tengnoupal district nung Indo-Myanmar anasa security forces temi improvised explosive devices (IEDs) pezü, prangbong aser tongtepratepdang amshiba osettem ngutetogo, ta ketdangsürtemi Brehostibarnü metetdaksü.

Itangitertem nungi Moreh Police Station kübok Border Pillars 72 aser 73 anasa ozüng alema inyaksangshiba indang osang tejangja angazükba sülen Indian Army, Assam Rifles aser Manipur Police nung longiemer iba tesem meita oa liasü.

Meita aoba sentong ya azü teyari agia benoka inyak aser iba mapang security force temi SLR rifle ka, 9 mm pistol ka den magazine ka, radio sets pezü, radio set charger ka aser IED pezü nguteta liasü. IED tem yabo iba tesem nungsa raksa

entoktsüogo, ta ketdangsürtemisa metetdaksü. Kasa police station kübok Border Pillars 77 aser 79 anasa telungpur asem apuba sülen anogo ishika lir tang item hadirtem ya ngutetogo.

Osang ajanga ashiba agi, Wangthoi Nahakpam alias Lingjel (20), Nanaoba Nandeibam alias Angou (19), aser Malem Oinam alias Manithoiba (20) nung May 18 nü pua liasü.

Police-i ashiba agi, pua alirtem aser sepaitemi nguteta aliba hadirtem ya ken o dak sendaka aliba police station nem bendanga agütsüogo.

Maneni ketdangsürtemi ashiba agi, tenem aser lenden nung aliba district tem nung nakas aser checkpoint 113 amenoka Manipur kübok lendong ataloktsü ana nung aliba tesemtem nung meita aoba sentongtem tali benoka inyakdar.

Guwahati nung tzümetsüng azüoktsü atema project balala inyaktsü

Guwahati, Monupii/May 21 (Agencies): Guwahati nung tzümetsüng azüoktsü atema project balala asoshi Assam sorkari sen crore 1,459 benokdangogo.

Assam Chief Minister Himanta Biswa Sarma-i Bodhbarnü, Guwahati yimi mapangshia tzü agi metsüngba ya nokdangtsü asoshi mapang talangka asoshi tasa ka sangdongogo. Yimti alinük majungba aser tzü mopung melenshiba ajanga yimti nung aiben tzü bangdaka ayur.

X nung post ka ajanga Sarma-i, Guwahati yimti alinük ya auso mesüker aser tzü mopung melenshiba ajanga tzümetsüng aiben ajangshiba ya tebilemtsü ka kümogo, ta

ashi. Paisa, state sorkari iba tebilemtsü bentettsü atema sentong tapet ka yangludat, ta shisem.

"Ken o bentettsü atema jenjang agitsü asoshi ozü sorkar bendanga agütsür lir, aser tebilemtsü bentettsü atema onoki sentong ka yangludat," ta chief minister yagi ashi.

Inyakyim nung shilem ka ama Assam sorkari sen crore 1,459 alang GIS-based Storm Water Drainage aser Urban Flood Management Project benokdangogo, koba yimti nung kilentzü infrastructure ajungkettsü aser tzünglu kanga sashia aruba mapang tzümetsüng azüoktsü atema inyakyim tashi taitba

kümdaktsütsü asoshi lir.

Iba project kübok sen crore 500.95 Bahini Basin Project atema asütsü aser sen crore 958.10 Bharalu Basin Project atema asütsü, koba kilentzü tajungba küma yanglushitsü aser tzümetsüng agi kongshiba tesemtem nungi tzü kanga junga mesütoktsü atema asütsü.

Project kübok Bharalumukh nung automated pumping station ka amenoktsüba densema lir.

Sarma-i ashiba agi, sorkar nükjiongji, scientific planning, modern technology aser advanced urban flood management system tem ajanga Guwahati yimti ya tzümetsüng nungi pila lidaktsütsü atema lir.

Ranjeet Kumar Dass Assam Assembly Speaker kümogo



mezüngbuba MLA tem ya parnoki mulungba oshi nung tenangzüktepba agitsü asoshi temelaba agütsüogo. Iba ajanga MLA karbo Karbi, Rabha aser Rajbongshi oshitem nung tenangzüktepba agitetogo.

Bhawanipur-Sorbhog nungi MLA Dass ya ajaki mulunga Speaker asütsü shim. Pa 2016 küm June ita nungi 2017 küm January ita tashi Speaker ama inyaker liasü.

Dass ya taoba mapang osangbener ka aser tesayur ka liasü aser 2005 küm yimden yimsüsüba nung majemok tsüngda Indian Information Service (IIS) officer ama inyakogo. Pa taoba mapang BJP Assam unit tir aser panchayati raj and rural development minister ama inyakogo.

Angh Lakshman Prasad Acharya-i Hokolbarnü Assembly nung o jembitsü. Assam nung Uniform Civil Code (UCC) benoktsüba dak sendakba nung legislation ya May 26 nü table asütsü imlar.

Guwahati, Monupii/May 21 (Agencies): 16buba Assam Assembly Brehostibarnü tenzükogo, aser BJP legislator Ranjeet Kumar Dass tanabuba term atema Speaker asütsü shimogo. Kasa anogo MLA tem tenangzüktepba agia liasü.

Anogo pezü agitsü aliba session ya BJP MLA Chandra Mohan Patowary pro tem Speaker asütsü shima tenzüka liasü. Pa ya züngsem 126 agi kümteba House nung ajak dang tejentiba züngsem lir.

Patowary-i ketdangsüa Chief Minister Himanta Biswa Sarma aser cabinet minister

pezü; Asom Gana Parishad (AGP) nungi Atul Bora, BJP lenir Rameswar Teli aser Ajanta Neog, aser Bodoland Peoples Front (BPF) MLA Charan Boro nung tenangzüktepba agia liasü.

Iba sülen tanungba legislator tem tenangzüktepba agi. Züngsemtem ya Assamese, Hindi, Bengali, Bodo, English aser Sanskrit oshi nung tenangzüktepba agia liasü.

Chief Minister Sarma-i Assembly dang ashiba agi, Constitution Eighth Schedule nung züngoksema aliba oshi 22 rongnung ka mesüaka tang

GOVERNMENT OF NAGALAND DIRECTORATE OF HEALTH & FAMILY WELFARE NAGALAND: KOHIMA No. DHFW-5/TRG/NIAHK/2023-24 Dated, Kohima the thMay. 2026. ADVERTISEMENT In pursuance to Govt. approval No.HFW(A)ESTT-NIAHc/179/26/118 Dated Kohima, the 12th May,2026 interested candidates from bonafide Indigenous Inhabitants for the State of Nagaland are invited for Lateral Entry to Bachelor of Science in Medical Laboratory Technology (3rd Semester) 2026 at Nagaland Allied & Healthcare Kohima affiliated to Nagaland University (N.U). 1. Candidate should be PU (10+2) Science passed (Physics, Chemistry & Biology) 2. Candidates should possess DMLT Certificate (Passed Certificate and Mark sheet) from recognized Central/State Government Institute. 3. Number of seats for Lateral Entry to BSc. MLT is 3 (three). 4. Selection of the candidates shall be based on Academic Merit Marks (DMLT). 5. Preference will be given to regular passed out candidates (DMLT) without any back paper(s). 6. Issue of forms 1st June to 8th June 2026. 7. Last date of submission of application form shall be on 12th June 2026. 8. Application along with DMLT Certificate duly self- attested should be submitted along with theST/ SC and Indigenous Inhabitant Certificate, which is compulsory. 9. Incomplete application, if submitted, will be summarily rejected. * Any other related information may be obtained from the Office of The Principal NHIAC Kohima during Office hours. Phone: +91-3707960098 SD/-DR. MERENINLA SENLEM Principal Director Directorate of Health & Family Welfare, Nagaland: Kohima.

US-i Cuba taoba tir Raul Castro anema ken o benokogo

Miami, Monupii/May 21 (Agencies): Miami nung aliba exiles temi 1996 kum civilian tayimtsü tem khazüka yokba nung Bodhbarnü federal prosecutors temi taoba Cuba tir Raul Castro anema mapa tamajung inyakba ken o benokogo.

Ken o benokba nungya exile group Brothers to the Rescue ajanga amshiba tayimtsü tila ana khazüka yoktsü Castro-i totuyuba agütsü ta tai tongloktsür. Castro, shiba taruba ita arishi kum 95 ajungtsüba lir, pa iba mapang Cuba indang defense minister inyaka liasü. Iba ken o ya April ita grand jury kati miima benok, kong nisung tepsetba aser tayimtsü raksatsüba dena lir. Kasa ken o nung Cuba military pilot pongu densema lir.

"Kum 30 jungnüa tepseter aliba America nung pezü kinunger temi ochi obendang ataa liasü," ta acting Attorney General Todd Blanche-i Miami nung item tepseter alirtem nem akhum agükja sentong ka alidang ashi. "Parnok ya nok-nü maben civilian tem liasü aser Florida straits nung timtem ajurua aliba nüburttem jena aoba kumzüksü asoshi humanitarian missions inyaka liasü."

US nung iba ken o jembitsü atema Castro bener arutsü American keddangtsür temi kechi tashi inyaktsü ta asüngdang dang, "Pa aputsü atema warrant ka agüja lir. Anungji pa yagi pa sasa mesüra lenmang kar ajanga arutsü imlar," ta Blanche-i langzü.

Cuba atema kechi asütsü ta asüngdang dang, "Asenoki repringdangtsü," ta Tir Donald Trump-i ashi. Paisa "failing nation" nem humanitarian teyari agütsütsü US renema lir ta ashi.

Castro ya US courtroom nung tetsüng ajemoktsü asü masüar mejangja, ajisüaka nisung tepsetba aser tasa tamajung inyakba tai tonglokja ken o benokba nung aitsüra

arishi tepiyong tepuokdak ayutsü mesüra tasüba temerenshi agütsütsü.

Cuba Tir Miguel Diaz-Canel-i iba ken o benokba ya 'political stunt' ka lir aser Cuba anema tamachi nisungtemi mitkari tashiyim amshiba temeden bushiba kisung lir, ta ashi.

Social media post ka nung US-i iba tayimtsü khazüka yokba nung tiazü jembir aser ken o perepsar, aser yangji iba mapang Cuban keddangtsür temi kiralongrar-i par airspace nung aibelen mapa tulu inyakba nungi kumzüka ayutsü tekumdangtsü aiben agütsüba senzüka yutsüba dena lir, ta Miguel-i ashi.

Miami nung Bodhbarnü iba sentong nung adener rongnung Marlene Alejandre-Triana liasü, shiba tebu Armando Alexander Jr ya tepset aser iba mapang la college azüngtsü kidang nungi pila orr liasü.

Ajisür liyonga arudang lai federal investigators aika den Castro anema ken o benoktsü jembia aru aser Castro ya iba mapa tamajung tasa yanglur tongti ka ama athishia liasü. Ajisüaka tang tashi shingai tasü ita lar kibong aser tangartem asoshi ochi obendang bushitsü tasü meittet.

US sepaitemi Venezuela taoba tir Nicolas Maduro apuba sülen Trump-i Cuba nung military action agitsü amokmerena arur. Maduro ya mapang talangka nungi Cuba sorkar jenokdak ka am alia aru. Maduro apuba sülen White House-i Cuba dang totzü ayokba nokdangtsü totuyuba agütsü, aser iba yongji iba asetkong linük nung blackouts, chiyongtsü agi anüngba aser rongsenketzüng tashi mait akumba ajurua liasü.

Maduro apuba sülen Trump-i Cuba nung sorkar melentsü indang jembia aru aser American investment atema par rongsenketzüng melapoktsüra iba linük ya yimjung leni agitsü aser US

tsükchir tem meindoktsü kum tetenzüklen nangzüka liasü.

Trump mezüng kümsük mapang Maduro-i temesepba mozü shibelener ta ken o benoka liasü aser aji kuli ka ama amshia pa yimsüsüba menden nungi atsüngdoka ken o jembitsü New York-i pua bener aru.

Castro-i tir menden ya shiranga alisang teti Fidel Castro nungi 2006 kum agizük aser 2018 kum Diaz-Canel nem iba tashi amoktsü.

Pa 2021 kum Cuban Communist Party tekolakba mapa nungi anisüngzükaka yimtenren nung temai madoki pai tashi amshir ta amanger aser ibaji par semchir Raúl Guillermo Rodríguez Castro alimai meteta akumba ajanga jangjatsür.

Taoba hopta CIA Director John Ratcliffe ya Havana-i Castro'er semchir densema Cuban keddangtsürtem den senden ameni ao. State Department keddangtsür anatia April ita senchir den ajurutepa liasü.

1995 kum Brothers to the Rescue züngsem temi tayimtsü tem nung Havana anüngleni arua Cuba nung dang Castro sorkar anema nokdaksü ajungmesoa leaflets tem tsükdaksü.

Cuba nung longkak aitiba sülen Federal Aviation Administration-i a bushisüngdang tenzük aser iba telok lenirtem ajurua tayimtsü mesenzütsü ajungshia liasü.

Ajisüaka item tayongzükba mangashi ama yutsü aser February 24, 1996 nung Russia-i yangluba MiG-29 fighter jets nungi missiles khaloktsüba ajanga Cuba indang airspace alema oa Havana north tsütsü civilian Cessna tayimtsü ana khazüka yoka liasü. Tayimtsü nung mena alir nisung pezüprong asü. Tayimtsü tasembuba nung iba telok lenir mena liasü, aser tera agi iba lendong nungi jenbua liasü.



OFFICE OF THE LANGPANGKONG KAKETSHIR MUNGDANG

Langpangkong Students' Conference

H.Q Chuchuyimlang- 798614, Dist. Mokochoing: Nagaland

Email: Langpangkongkaketshirmungdang@gmail.com

Ref. No. LKM/GS/FEL- 03/2026

TENÜNGSANG AGÜTSÜR



Sb. Ochitizuk Jamir



Kr. Moarenla Ozukum

Tanü putu tajunger rongnungia tajungtiba asütsü toktepba younger nung atongsemeter ozü Langpangkong kaketshir rongnungia takotet nübu tajung anati tawa sangdongba 2025 NSSB CSRE tatidang nung takok tulu nguteta pei takum jenjang nükmen amentetba den asen Tzukongsanger ajak tejak tentetdaksu nung nena nem asen Langpangkong Kaketshir Mungdang (LKM) ajanga takok konang nüngsang tulu agütsür. Sorkar tenzükba wadang nung ajemoker inyaka aodang nungdaksapurttem atsünglokdkak khunendong tajung kaka asütsü asen LKM tamang sarasadem.

- 1) Sb. Ochitizuk Jamir,** S/o. Wb. Tsuknuyatet Jamir & Wt.Chubamenla, Unger village; Pai Planning & Transformation Department (District) nung LDA cum Computer Assistant ngutet.
- 2) Kr. Moarenla Ozukum,** D/o. Wb. Temjenwati Ozukum & Wt.Akumbenla, Mongsenyimti village; Lai Animal Husbandry & Veterinary Department (Directorate) nung LDA cum Computer Assistant ngutet.

Sd/-
Tzuwasanen
President

Sd/-
Walunir
General Secretary

Pakistan-i US-Iran yimjung ken o jembidaksütsü meranger

Dubai, Monupii/May 21 (Agencies): Tekeraba nung US aser Iran yimjung ken o jembitsü asoshi Pakistan-i Brehostibarnü mera agiogo, kechiaser Tehran-i nuclear ken o nung par tajemdak dak akangshir aser US Tir Donald Trump-i telangzüba shidak mongura ano amaktsü amokmerener.

Tashi mait ceasefire tenzükter hopta trok sülena rara tembangtsü jembishinüba nung terenlok kangabo mali, aser totzü jenjang tali akumba ajanga osettsüset nunga jenjang tali akumer aser alima rongsenketzüng tia mejungi akumer.

Ano Trump ya November ita midterm elections agitsü lia linük nung teblemtsü ajurur, kechiaser totzü jenjang tali akumba ajanga pa approval rating ya tang tamajungtiba nung lir.

Pakistan Army Chief Asim Munir-i yimjung asoshi tetsüngtai aitsü atema Tehran-i aotsü atema Brehostibarnü telemtetba agitsü, ta osang kar ajanga ashir.

Pakistan indang interior minister ya Bodhbarnü Tehran nung liasü.

Iran indang ISNA news agency-ibo Munir ya shisa agiteptsü atema Brehostibarnü Tehran-i arutsü, ta shia liasü. Tehran nung jembiba ya general framework indang lir ta ashir.

Ajisüaka Iran lenir anati

ashiba agi, Tehran indang nuclear programme nung US-i akhangba tongtipangtiba nung Iran akangshia nokdaker.

Supreme Leader Ayatollah Mojtaba Khamenei-i Iran indang 'near-weapons-grade uranium' ya bendang leni meyoktsüla ta totuyuba agütsüogo, ta osangtem ajanga ashir.

Bodhbarnü Trump-i telangzüba atatsü mulunga lir saka ano asendenshir amaktsüa renema lir ta shia liasü.

"Onoki telangzüba shidak mongura, onoki kera aotsü. Onok aotsü atema ajak renema lir," ta Trump-i osangbener dang ashi.

Pa dang kopika atatsü ta asüngdang dang, "Anogo ishika asütsü akok, saka kanga kera aotsü," ta langzüa liasü.

Iran indang Revolutionary Guards ajanga asendenshir mamaktsü tekumdangtsü shia lir. "Iran anema tashiyim mapa maneni inyakra, tanbo nangzüka aliba regional war ya region alema aotsü," ta sangdong ka nung ashi.

Iran-i par maongka tasenba US nem tan hopta agütsüogo.

Tehran-i ashiba nungya taoba mapang Trump-i magizükba timba alia ma ajiteter, kong Strait of Hormuz aziüktsü, rara nung raksatsüba asoshi compensation, sanctions agientsü, soita aliba rongsen salatsü aser US sepaitem anizüker aotsü densema lir.

(Maneni tapak 8 nung...)



China linük tiyonglen Hunan Province kübok Shimen County, Changde City nung keddangtsür temi May 21, 2026 nü helicopter ka nungi yimdaklirtem anizükba noksa nung angur. Tawas Hunan nung tesem kar nung zümetsüng tesashi adoka asü-amaba jenti liasü aser ki o jen aika raksatsü. Iba province indang Shimen County nung tanen makai zünglu kanga sashia aruba ajanga nisung trok asü aser nisung 10 samar bushiba mapang lir.

Ranji Trophy October 11 nungi tenzuka asayatsü

Monupii/May 21, 2026 (Agencies): Board of Control for Cricket in India (BCCI)-i Bodhbarnü 2026-27 domestic season atema mapanglem sangdongogo aser Ranji Trophy maneni two-phase format nung asayatsü.

Ranji Trophy ya October 11 nü tenzük aser domestic calendar ya August 23 nü nungi Duleep Trophy asaya-a tenzüksü.

Taruba season nung tetsür aser tebur asaya ajak senteper asaya 1,788 asayatsü.

Tetoktepba ya teburtem atema U-16, U-19, U-23 aser senior asayamungtem asütsü aser tetsürtem U-15, U-19, U-23 aser senior asayamungtem asayatsü.

Ano temelenshi kaji BCCI-i U-23 one-day asayamung aser Vizzy Trophy atema inter-zonal university tetoktepba ya T20 format kümstüogo.

Duleep Trophy koba zonal format nung asayatsü, iba asayamung ya August 23 nungi September 10 tashi asayatsü. Asayamung ajunga ya Bengaluru nung BCCI indang Centre of Excellence nung asayatsü.

Ranji Trophy champions Jammu and Kashmir aser Rest of India na tsüngda Irani Cup ya October 1 nungi 5 tashi Srinagar nung asayatsü.

BCCI indang domestic calendar nung ajak dang tongtibangtiba asayamung Ranji Trophy mezüngbuba shilem ya October 11 nungi November 5 tashi asayatsü, koba round pezü asayatsü.

Tanabuba shilem ya January 17 nungi March 3, 2027 tashi asayatsü, koba Syed Mushtaq Ali Trophy (National T20s) aser Vijay Hazare Trophy (National 50-over meet) na tembangba sülen asayatsü.

SMAT ya November 14 nungi December 6 tashi asayatsü. League asayatsüba tesem pezüji Mumbai, Mohali, Vizag aser Kolkata asütsü. Knock-out stage ya Nagpur nung asayatsü.

Syed Mushtaq Ali Trophy ajanga asayar shimertem nem taruba IPL auction atema asayartem shimtsü asoshi maongka agütsütsü.

Vijay Hazare Trophy ya 2026 küm December 14 nungi 2027 küm January 8 nü tashi asayatsü.

Maneni Vijay Merchant Trophy (U16) ya November nungi January tashi asayatsü atema telemtetba agiogo.

Iba ajanga school-i tu dak aliba cricketer asayartem annual mesüra board tatidang atema renemtsü asoshi maongka agütsür, koba yimya agi February aser March ita agir.

Salah lenisüba nung Egypt team World Cup asayatsü



Monupii/May 21, 2026 (Agencies): World Cup atema Egypt preliminary squad nung asayar 27 tenüng sangdongba nung züngoksemba sülen Mohamed Salah lenisüba nung Egypt team asayatsü.

Arishi küm 33 tain asayar, shiba season tembangba sülen Liverpool toktsütsü lir, pa Egypt tenüng nungi tang tashi nung asaya 115 asayar lir aser iba mapang goal 67 idaktsür lir.

Pa den Manchester City winger Omar Marmoush aser Barcelona Under-19 team nungi asayar arishi küm 18 tain Hamza Abdelkarim nata squad nung densema lir.

Nantes forward Mostafa Mohamed team nung mali aser head coach Hossam Hassan-i May 28 nü Russia den Cairo nung friendly ka asayaba sülen asayar ka toktsütsü, kechiyong squad nung asayar 26 dang alitsüla.

Egypt team ano June 6 nü Brazil den Cleveland nung friendly ka asayatsü.

World Cup nung Egypt team Group G nung lir aser parnok June 15 nü Belgium den, June 22 nü New Zealand den aser June 27 nü Iran den asayatsü lir.

US, Canada aser Mexico nung team 48 asayatsü aliba World Cup ya June 11 nungi July 19 tashi asayatsü.

Egypt World Cup squad Goalkeepers: Mohamed El Shenawy (Al Ahly), Mostafa Shobeir (Al Ahly), El Mahdi Soliman (Zamalek), Mohamed Alaa (El Gouna).

Defenders: Mohamed Hany (Al Ahly), Tarek Alaa (Zed), Hamdy Fathy (Al Wakrah), Rami Rabia (Al Ain), Yasser Ibrahim (Al Ahly), Hossam Abdelmaguid (Zamalek), Mohamed Abdelmonem (Nice), Ahmed Fatouh (Zamalek), Karim Hafez (Pyramids).

Midfielders: Marwan Ateya (Al Ahly), Mohanad Lasheen (Pyramids), Nabil Emad (Al Najma), Mahmoud Saber (Zed), Ahmed Zizo (Al Ahly), Emam Ashour (Al Ahly), Mostafa Ziko (Pyramids), Mahmoud Trezeguet (Al Ahly), Ibrahim Adel (Nordsjaelland), Haissem Hassan (Real Ovideo).

Forwards: Omar Marmoush (Manchester City), Mohamed Salah (Liverpool), Aqtay Abdallah (Enppi), Hamza Abdelkarim (Barcelona).

Aston Villa-i Europa League final nung Freiburg kokogo

Monupii/May 21, 2026 (Agencies): Istanbul nung Europa League final nung Freiburg goal 3-0 agi akokba sülen Aston Villa puri küm 30 lir tang mezüngbuba takok marok ka ngutetogo aser 1982 küm sülen tang mezüngbuba European trophy ka kokogo.

Unai Emery lenisüba nung Villa-i final asaya ya amokbanger asaya-a liasü. Parnok rongnungi Youri Tielemans, Emiliano Buendia, aser Morgan Rogers nungeri goal kaka idakja parnoki asaya ayong ayonga akok.

1996 küm League Cup akokba sülen Aston Villa-i tang mezüngbuba tongtibang asayamung ka kokogo. 2022 küm Emery-i coach mapa agizükba sülen team kanga

melenshiogo, iba mapang parnok Premier League nung relegation zone-i terara agi ta mai asaya liasü.

Iba tetoktepba nung Unai Emery-i takok tajung ngua arudar, aser tang agi pongubenbuba Europa League title benogo. Pa Sevilla coach asüba mapang Europa League asembe akok aser Villarreal nungi ka aser tang Villa nungia iba asayamung kokogo. Pa Carlo Ancelotti, Jose Mourinho aser Giovanni Trapattoni nunger den kasa kümogo. Parnok ajaki European trophy pongungu koker lir.

Asaya nung Villa asoshi mezüngbuba goal ya Tielemans-i minute 41buba nung idakja liasü. Iba sülen asaya mezüngbuba shilem matem

tsüngda Buendia-i tanabuba goal idaktsü. Maneni asaya tanabuba shilem tenzük minute 58buba nung Rogers-i par team asoshi tasembuba goal idakja parnoki asaya ayong ayonga akok.

Freiburg pur tang mezüngbuba European final ka nung asayaogo, aser parnoki Villa pur den toktepa masayatet.

Tang agi season anabuba Premier League club temi Europa League kokogo. Taoba season Tottenham Hotspur puri iba asayamung koka liasü. Kasa mapang nung taküm PL club temi Europe nung asayamung tongtibang asem akoktsü timla lir, kechiyong Arsenal pur Champions League final aser Crystal Palace pur Conference League final asayatsü lir.

Malaysia Masters: Ashmita Chaliha quarter-finals-i iogo



Monupii/May 21, 2026 (Agencies): Tang asaya aliba Malaysia Masters Super 500 tournament nung Brehostibarnü Ashmita Chaliha-i pre-quarterfinals asaya koka tetsür kija asaya quarterfinals-i iogo, aser India nunger asayartem rongnung la kija anunga lir. Brehostibarnü la dak alaker India nunger asayartem ajak tsükogo.

Pre-quarterfinals asaya nung Ashmita-i Malaysia tsür Goh Jin

Wei 21-13, 21-16 agi ayonga ayonga koka liasü. Lai lenla ajak nung kanga junga asaya-a iba asaya ya minute 30 nung dang koka liasü.

La taruba asaya Denmark tsür eighth seed Line Højmark Kjaersfeldt den asayatsü.

Tetsür kija asaya nung Kjaersfeldt-i India tsür Malvika Bansod 21-16, 8-21, 15-21 agi koka taruba round tongtetogo.

Asaya nung mezüngbuba set bo Malvika-i akok, saka tanungba

set ana mekokteti la tsükatok.

Ano tetsür kija asaya tanga ka nung reigning Thailand Masters champion Devika Sihag-a top seed China tsür Chen Yufei-i 21-16, 21-13 agi dang minute 36 nung koka liasü.

Tarep temeyoktep asaya nung India nunger tarep Sathwik Kanapuram aser Radhika Sharma nati kanga meranga asaya saka 12-21, 25-27 agi America nunger tarep Presley Smith aser Jennie Gai na makok.

Tebur tarep asaya nung India nunger tarep Hariharan Amsakarunan aser MR Arjun natia China nunger Hu Ke Yuan aser Lin Xiang Yi na 14-21, 15-21 agi mekoki liasü.

Iba asayamung nung Bodhbarnüa India nunger asayartemi junga masayateti Lakshya Sen aser HS Prannoy nunger ajak tsüka liasü.

BENDANGLI OSANG : Tapak 7 nungi...

Pakistan-i US-Iran yimjung ken o...

Rara metenzükdang Strait of Hormuz, koba ajanga alima nung totzü aser liquefied natural gas shilem 20 shi bena liasü, iba ya ajunga ama shibanger alima nung energy supplies tsütsü kanga timtemtar.

Bodhbarnü Iran-i map ka sayaba nung strait nung "controlled maritime zone" ka sayua liasü aser iba tesem ajangtsü atema ketdangtsü nungi temelaba nungdaktü ta ashi.

Par ozüng sülen anidakba tembar linüktem asoshi

tanaben lapoktsütsü nükjiding nung lir ta ashir.

China nunger supertankers ana nung totzü barrels 4 million shi bener Bodhbarnü iba strait alema adokogo, aser South Korean tanker ka nung totzü tazü barrels million ana Kuwait nung oshir Iran den osang agitepa iba strait ajanga liasü.

Tesüiba ghonda 24 tsüngta rong 26 iba tesem ajangogo, ta Iran-i ahir, aser rara metenzükdang anogoshi iba tesem ajanga rong 125 nungi 140 tsüngta senzua liasü.

BILEMDANGANG

"Nisungtemi panoki asoshi kechi tajungba aji masü saka kechi tezübaba aji inyaker."